

In annuari pulpiu d'informaziun e divertiment

Il «Calender Romontsch» 2020 ei gest cumpariu quels gis en sia 161avla annada

DA MARTIN CABALZAR

■ Il «Calender Romontsch» ei cumpariu. La 161avla annada da quei pli vegl e derasau annuari romontsch cuntegn era uonn in tschuppel contribuziuns da different gener. Per la redacziun ei Lisa Schmidt-Candinas responsabla, per la cuviarta ha la dessignadra d'art Anna Schmidt procurau e sco editura segna Somedia Production. Era uonn ha la redactura Lisa Schmidt-Candinas procurau per in annuari pulpiu, variunt ed informativ e quei sin passa 250 paginas. Il «Calender Romontsch» 2019 ei structuraus els capetels calendari, giubileums, poesias, historias, credo, Belgia, museums, art ed artists, scolaziun e formaziun, en memoria ed annexa. Sco tematicas centralas dall'ediziun d'uonn ha la redactura tscharniu il cercchels tematics credo/cardientscha e museums sursilvans. Era uonn eis ei reussiu alla redactura da gudignar novas collaboraturas e novs collaboratur per siu annuari.

Credos persunals

El fasch tematic «Credo» s'expriman 11 persunas davart lur cardientscha ord in'optica fetg persunala. Introducius vegn il capetel entras il Credo apostolic bein memorisau ed enconuschents – silmeins alla generziun veglia – tras sia recitaziun ni cantada regulara el survetsch divin eucaristic. Cooperau alla varietad da quella rubrica tematica pli profunda han: Tresa Rütters-Seeli, Maria Cadruvi, Anton Capaul, Viola Cadruvi, Thomas Imboden, Isabella Defuns e scolars, Christina Tuor, Flavio Bundi, Marius Hublard ed Asa Hendry. Las contribuziuns che derivan da teologs e laics, da litterats ed auters, illustreschan il pluralissem da meins e tenutas che progredeschan era en nossas valladas muntagnardas e periferas ed effectueschan aschia in mosaic multi-



Per la tiarza gada segna Lisa Schmidt-Candinas sco redactura dil «Calender Romontsch».

FOTO LO

color da nosa societad contemporana, era en Surselva.

Museums tut a dubel

Tgi che sfeglia il «Calender Romontsch» 2020 ei surstaus ton dil diember sco dalla multifariadad dils museums en Surselva. Sper ils dus gronds museums regiunals, il Museum Cuort Ligia Grischa (historia) ed il Museum Regiunal Surselva (artisanadi) a Glion, dat ei in'entira retscha da musems locals, archiv cultural, arcuns da tradiziun e casas da cultura. Tenor l'anteriura curatura digl MRS,

Marianne Fischbacher, ein ils emprems museums locals vegni scaffa 1899 a Sedrun (La Truaisch), 1947 en Val S. Pie-der, 1964 a Vuorz, 1980 a Laax e 1981 a Stussavgia-Camana. Pli tard han menaschis cun temas specifics completau la purschida, aschia il luvratori mecanic Giger a Schnaus, il museum da cristals e minerals Cristallina ed il fallun e la cascharia Disla a Mustér, la fortezia militara Stalusa, l'Ogna a Trun, il Museum dalla claustra da Mustér, il Museum dil meister da Vuorz entochen alla Casa d'Angel, la casa da cultura dalla Lum-

zia a Lumbrin. Arrundada vegn la survesta culs archiv cultural da Sumvitg a Surrein, dalla Foppa a Rueun e dalla Lumnezia ad Uors e cugl Archiv Latour a Breil. Las differentas instituziuns vegnan presentadas en plaid e maletg da lur responsabels.

Belgia – Coray – DRG

Dumeni Columberg ch'ha apparteniu 12 onns al parlament d'Europa ed ei staus incumbensau sco intermediatur special el conflict linguistic en Belgia rapporta da sias experiencias ch'el numna ina «mis-

siun nunpusseivla» e trai parallels culla Romontschia. Il portret da quest calender ei dedicaus a «Luis Coray – il stroli da Laax». Erwin Ardüser ha presentau siu convischin da Laax sco persona originala, sco tradizionalist e visionari, engaschus professionalmein sco logoped che sededichescha denton era cun predilezziun al lungatg, al cant ed alla musica.

Il linguist e redactur dil Dicziunari Rumantsch Grischun Ursin Lutz presenta il DRG sco arcun prezios da lungatg e cultura ch'ei uss era accessibels online. La redactura Lisa Schmidt-Candinas presenta la lavur da matura da Panda Poldi ch'ha realisau in cudisch d'affons sco lavur da matura.

Giubileums – poesias – historias

En connex cul giubileum da 10 onns dalla Chasa Editura Rumantscha relata Anita Capaul da siu engaschi per il cudisch romontsch e sedamonda sch'ei vegni insumma aunc legiu cudischs en vesta alla digitalisaziun.

Per il giubileum da 50 onns dalla Fundaziun Retoromana (FRR) resdan Susan Rupp e Francessg Friberg dalla historia da quell'instituziun che porscha cuors da romontsch sursilvan che vegnan frequentai ordvart stedi.

Ella rubrica litterara vegnan Tresa Rütters-Seeli, Martin Fontana e Rest Gliott a plaid cun poesias, Lisa Schmidt-Candinas e Letizia Winzap-Monn (maletgs), Viola Cadruvi e Felici Schuoler cun prosa e raquens.

S'entelli ch'era il «Calender Romontsch» 2020 vegn introducius cul calendari ed arrundaus cun ina gliesta da success professiunals e da studi, culla memoria als trapassai, cun in mini calender statal, il register obligat dils paders benedictins da Mustér e dallas muniessas dominicanas da Glion ed in register dils cudischs novs relevants per la Surselva.

Puspei consecrada d'in nunzi

In guard anavos silla consecraziun digl onn 1712

DA GIUSEP CAPAUL / ANR

■ Da s. Martin ei la baselgia claustrala renovada vegnida consecrada dil nunzi apostolic, arzuestg Thomas Edward Gullickson. El deriva dils Stadis Uni e residiescha dapi 2015 a Berna. A quella caschun ei era il niev altar vegnius benedius. Quei munti atgnamein la consecraziun-baselgia. Il nunzi papal ha be-

nediu igl altar en ina tschaffonta cerimonia rituala da profund cuntegn e gronda expressiun.

Il pievelun ei staus fetg emperneivla-mein impressiunaus e surprius co il consecrand ha fatg quei ed era priu a cor quei ch'el ha detg el profund e clar priedi sco era ils plaid da gronda simbolica durant la consecraziun. In mument historic per la claustra.

Plidentond suenter gentar il nunzi Gullickson hai jeu menziunau ch'il consecrand dalla baselgia claustrala a Mustér 1712, lu gest erigida, seigi era staus in da ses antecessurs, numnadamein il nunzi papal Giacomo Caracciolo. Il nunzi dad uss a Berna ha giu grond plascher d'intervignir quei ed insumma ch'el ha astgau consecrar il sanctuari claustral en sia gronda spendur.

Lein ir biebein 300 onns anavos

Ils 11 da settember 1712, pia avon 307 onns, ha il nunzi papal Giacomo Caracciolo, in Talian, consecrau la baselgia claustrala a Mustér, erigida da niev era cun la claustra. Uestg Caracciolo ei staus nunzi apostolic da 1710–1716. El residia a Lucerna ed era representant dil papa tier ils cantuns catolics, las Treis Ligias, era cun tut lur territoris subdits, e pil Valleis. Envidaus da vegnir a benedir la nova baselgia claustrala fuvu el vegnius d'avat Adalbert Defuns. Nunzi Caraccioli ha dau triev a quei giavisch expressiv era dil pievel e consecrau la grondiusa baselgia claustrala (tenor el: fabbrica magnifica), ch'ins veva entschiet a construir 1683 ed erigiu cun gronds cuosts e bia stentas.

Priu part dalla consecraziun dalla baselgia claustrala 1712 – ei fuvu ina dumengia – veva in fetg grond diember d'omisduas schlattinas, e quei buca mo ord la Rezia, mobein era neu dall'Italia e dalla confederaziun vischina.

Per siu survetsch da benedir ha nunzi Caraccioli vuliu negin schenghetg, mobein sulet giavischau ch'igl eveniment dalla consecraziun tras el vegni engravaus en marmel sin ina tabla e da metter quella gest sur l'entrada dalla baselgia. Ina cara tabla regurdonta en marmel ei denton buca stada realisabla. Persuenter han ins scret cun color il text latin davart la consecraziun tras nunzi Giacomo Caraccioli – tut aunc oz veseivel – sur l'entrada dalla baselgia claustrala. Perencunter ei vegniu pustau en baselgia gest sur l'en-

trada igl uoppen dil nunzi Caraccioli (cun in liun) sur ils uoppens dils dus avats construiders sursilvans Adalbert da Medel (1655–1696) ed Adalbert Defuns (1696–1716). Pér tier la restauraziun da 1925/26 ein quels uoppens vegni enramai cun stuc.

La benedicziun e dedicaziun dalla baselgia claustrala 1712 vegn aunc adina festivada onn per onn en claustra a Mustér ils 11 da settember.

reclama



Sur l'entrada dalla baselgia claustrala ei la consecraziun digl onn 1712 eternisada.

FOTO G. CAPAUL



Südstschweiz informiert

Topaktuelle Nachrichten aus Ihrer Region von Montag bis Freitag ab 18 Uhr.

Nur auf TV Südstschweiz

